

摘藻堂四庫全書薈要

集部

欽定四庫全書薈要

集部

御選明詩卷八十七

詳校官原任主事臣李斯咏

欽定四庫全書薈要卷一萬八千五百八十七

集部

御選明詩卷八十七

七言律詩二十

曹學佺

送陳民部出守思州

言辭粉署重淒淒
道路時聞征馬嘶
日照夢懸鄉樹外
夜郎吟向郡樓西
竹雞羣裏登峨嶺
銅鼓聲中出朗溪
我欲白門攀柳送
相思此夜有烏啼

金陵懷古四首和汪仲嘉

江東列郡領丹陽
鼎足三分此一方
總為石頭成虎踞
不知巫峽下龍驤
雲生寢廟千秋閔
月照籬門幾夜長
年少風流能顧曲
行人猶自說周郎

一從荆棘歎銅駝
五馬為龍世所歌
晉室山河遺略盡
雒中人物過江多
楊花寂寂新宮出
燕子依依舊宅過
欲向登臨感陳跡
至今天闕尚嵯峨

鍾阜霜飈館已傾
至今哀壑起秋聲
針樓銀漢含情語

畫簾金蓮逐步生日落盧龍迷古戍天寒白馬走空城
不堪重理玄暉詠極目澄江似練平

齊雲宮觀景陽樓盡入隋家作蔣州下若溪寒明月夜
後庭花落隔江秋疎鐘夢斷猶疑響紅淚看餘獨不流
何事高情江僕射攝山泉石恣淹留

謝公墩

謝公墩上日閒行四野霜天一倍明亭館已空雲物麗
寺門相近夕鐘清寒山又傍斜陽路江水終銷十月聲

載妓如花不同賞風流應感古今情

楓亭

長亭山勢倚岩堯半壁斜陽散采樵野燒輕陰遙渡水
海門喧市乍歸潮蘆花古戍生殘角木葉西風過斷橋
回首不堪仙路遠馬頭塵夢又今宵

安蓋卿招集蔣弢仲鄭肇中徐興公諸子送春
令節那容心賞違天涯有客喜相依似因歲閏遲遲別
不道春光黯黯歸閣下鈴籤稀報漏坐中單袷屢更衣

漫言白社凋殘甚掩映榴花杏子肥

顧起元

大司成李次卿晉少宗伯學士應召北上

入朝將押紫宸班祕史先成石室間風采乍驚臨虎觀
天香旋喜近龍顏時聞赤羽傳三輔歲遣朱輪訊百蠻
拭目金鑾新詔下侍臣初對玉堂還

熊廷弼

新卜東園

為愛池塘好避喧
新開別業向東原
梅山樹遶斜連谷
蓮渚橋通直到門
傳是舊時花柳巷
却來漫作桔槔園
主人初領林泉事
鎮日經營不憚煩

袁世振

天寧寺杏花

寺在揚州

古木疎陰綠色遲
老僧堅鎖最繁枝
一簾夜雨猶堪聽
十里春風總不知
陌道馬蹄飛雪後
鞦韆蟬影出牆時
膽瓶暫借遊人看
晴靄依依上苑姿

范鳳翼

夏日過飲君印靜芳軒即事

娟娟靜綠樹交加
障却炎塵客不譁
雨洗月光清似水
香聞蓮葉勝於花
移尊石几涼消酒
裊壁爐煙晚鬪茶
歌管何緣籬外度
鬱輪風調本君家

黃汝亨

朝發盤山飯千像寺

初日盤峯爽氣侵
薄雲輕騎上高林
石橫曉岫千巖競

泉落秋濤萬壑沈
鳥道偶窮松下路
僧家小隱澗邊陰
胡麻飯罷尋諸佛
亂點山容散紫金

張履正

送堵師甫方伯之任嶺南限韻

熊車曉發建朱幢
帝簡名賢任大邦
南海諸侯推最長
中朝國士本無雙
風清合浦明珠返
雨過炎州瘴癘降
相送一尊須盡醉
明朝回首隔滄江

阮自華

萬歲山

丹丘不離青冥上
玄武高憑紫翠重
北斗晨光低睥睨
西山曉色綴芙蓉
蕊宮掩映阿房樹
芝駕逶迤閤道鐘
朝罷金門幾回首
空中華蓋偃喬松

答湯義仍見寄

匡阜蕭條橫左蠡
鄱陽浩漶限南州
夜看斗氣知君在
曉聽江聲動客愁
人去鳳皇阿閣冷
書來鴻鴈大江秋
膝前宣室今誰是
一望瀟湘共白頭

曹徵庸

秋柳

長信宮前幾樹彫
風吹灞岸更蕭蕭
空勞好夢三千里
無那輕霜十萬條
青眼乍迷魂黯黯
蒼煙忽暗路迢迢
却憐二月春寒淺
占斷東風紅板橋

陳允升

碧浪湖

城外煙波浸碧天
城頭煙火萬家連
中流塔影浮寒玉

隔岸風光入畫船一片松雲歸獨鶴千秋俎豆列三賢
由來問俗多淳樸不似西湖競管絃

王衡

秋月感懷

水國高秋倍閨然涼風天末想娟娟黃花耐擁南樓屐
紅樹相看牛渚船白社避巢將客燕平林抱葉未歸蟬
那堪子夜烏啼盡荻岸楓城夢裏煙

計偕別長孺仲醇

結旆蕭蕭事遠遊沙湖潮上荻花秋征帆日落長江外
送客鐘聞野渡頭一夜弟兄吳市酒幾回風雪剡溪舟
緇塵古道渾如許珍重初衣問白鷗

與仲醇館中夜話

腰鎌無賴翦秋蓬孤館寥寥夜色空忽報客來鐘定後
共看心事月明中夢回書帶飛蝴蝶坐久經簾墮網蟲
種得芭蕉堪作紙墨莊荒盡舊牆東

大內蓮花

西山青落影娥池仗外芙蓉入照時薄雨未消初日暈
晚風欲語向人枝六宮香粉流紅膩三殿浮涼湛綠漪
的的夜舒人不見集靈臺畔露華知

蔡毅中

秋興

木落江空天氣清西風蕭颯鴈南征浮雲暗逐年華變
歧路虛憐短鬢生千里關河懸客夢萬家碁枰動秋聲
崇蘭芳芷依然在何處江潭弔屈平

雷思霈

臨懷素墨蹟

鷗羣鶴侶道人閑只住菁葱竹栢間
欲買小庄先問水但逢佳客勸登山
深林不放雲輕出野艇常邀月共還
家有懷公顛墨在臨時多染醉毫斑

趙士諤

來季方還蕭山

彷彿經過三十秋年年盼望越來舟
幾番夜雨曾聯榻

何處春山不共游往事茫茫渾是夢故人落落總堪愁
老來轉覺難離別欲去還期十日留

蔡善繼

春日閑居

幽棲未擬絕塵寰楚帝橋西水一灣樹裏暗浮鄰寺塔
樓頭青入傍城山不緣好客寧沽酒祇為高僧遂出關
春鳥自鳴花自舞禪心竟日與雲閑

劉宗周

酬別長安故人

弱柳千章鎖鳳樓，春風送別不勝愁。
杜門重憶十年病，束髮誰先天下憂。
銷鑠壯心吾自老，徬徨歧路子何求。
却教空谷傳驪唱，落日浮雲滿帝州。

陳勲

山居和韻

亂山飛翠似相迎，山畔山雞自喚名。
海雨挾潮歸極浦，溪雲扶月上孤城。
數聲漁櫓鳴寒漲，一酌村酤坐晚晴。

歌入滄浪秋思遠不妨倚和到參橫

石壓幽窗竹覆垣秋聲秋葉漸應繁雲歸却讓孤峯出
雨歇還添別澗喧遙夜山寒吟木客高林果熟快王孫
杜陵亦有憂時老短褐長鑱獨閉門

張翥

賦得霜前白鴈

霏霏金井露凝華搖曳橫空皓羽斜寒陣幾行迷野月
清聲何處亂蘆花素心欲託衡陽夢冷思還侵玉塞沙

為有稻梁恩未答帛書傳入漢皇家

長安秋興

禁牆蕭瑟半霜林
宮月高懸桂影森
銀闕曉鐘開霽色
錦城暮角散清陰
瞻雲不禁回鄉夢
捧日長懸戀主心
欲擬長沙空太息
幾回孤枕度蛩吟

樓居春暮

春事初殘雨一犁
豆苗瓜蔓長春畦
客來烹茗供新水
興到銜杯續舊題
剩有圖書翻枕上
總無亭館近灤西

小樓日出朝眠穩為語流鶯莫亂啼

吳應琦

滇中有懷

南詔春深暮雨昏懷歸畏有簡書存三年雪鬢行荒服
萬里冰心答至尊永夜衰親頻入夢何時稚子一迎門
龍眠櫻筍聞無恙短褐黃冠是主恩

魏濬

墟上詩

紆迴巖徑轉嵯峨笑問蠻家第幾窠入市每衣芒屨布
出門時唱浪花歌峒丁慣箬穢狐矢獐女能拋織貝梭
墟散盡投歸路去斷煙半隴罨荒蘿

樊良樞

暮春登滕王閣

江上春歸思渺然危欄百尺瞰寒煙美人南國銷芳草
帝子東風怨杜鵑半嶺孤雲銜落照一帆遠水淨浮天
月明十二樓頭曲夜夜吹簫到客船

楊鶴

匡山曉霽

絕勝匡山曉翠濃
蓮花千瓣劈芙蓉
石門曙色開仙掌
南嶺天星落寺鐘
赤日射潮遙辨海
紅雲擁帝下連峯
東林屐齒渾難禁
徙倚江干拄短筇

寄懷張子達伯仲

澤畔相思夢卜居
故人兄弟近何如
天邊黃葉新供眺
屋裏青山好著書
江口月明猿嘯夜
荆門霜落蟹肥初

再來剡曲堪乘興
畏爾淹留逼歲除

孫承宗

殫忠樓

縹緲憑高百尺頭
籌邊何暇坐銷憂
日窮江樹家千里
笛倚風檐月一鉤
藻井幕天開鴈陣
髮雲結市失龍湫
白山黑水簷楹外
玉帳蕭蕭萬壘秋

閱中右所鹽塲

牙旌西駐小沙河
結隊爭看碧玉珂
萬竈晴煙雲自滅

六花雄陣雪初多作鹽漫笑和羹手拊髀誰揮指日戈
匹馬長鳴應有意健兒新挽武剛過

中右城得魏道沖信

關山秋盡鴈隨陽鴈去人間不下堂絕塞猶弓空抱月
孤城畫角自吹霜青天欲問雲霄遠白髮還驚歲月長
漫說安危渾注意可從國手試溫涼

李流芳

錫山夜別閑孟子薪彥逸及從子宜之兒子杭

之二首

十日追隨意未傾一朝言別若為情祇憐對酒成高會
無那挑燈是送行家累關心難共語功名垂老不堪評
便應撥擢從東下十畝閑閑尚可耕

撩亂鄉愁一夕生燭殘酒醒奈深更隔船安穩歸人夢
前路迢遙去客情江月又催征棹發寒雞不待寺鐘鳴
十年分手梁溪路但覺衰顏負此行

小葺檀園初成

秋入吾廬景物賒一簾新月半闌花風迴水葉翻翻白
雨壓簷枝恰恰斜宅比柴桑多種柳門通苔雪可浮家
客來隨分能供具埽籜煨鐺與試茶

種花

為園數畝未言賒鑿沼疏泉手灌花花欲踈踈仍密密
枝須整整復斜斜漸看節序皆芳候不放風光到別家
最愛南榮冬日暖蠟梅一樹映山茶

訪慧法師於皋亭桐塢作

不見皋亭慧法師每勤書札慰相思蹉跎又作三年別
慙愧終無一往時忽憶虎溪成舊社且尋茅屋賦新詩
關門短棹衝炎去黃鶴峯頭月上遲

唐時升

九日海曙樓觀練士戲東同遊諸子

最高樓下瞰屯營九日轅門赤羽明綺席遙翻弓劍影
清談雜入鼓鼙聲乍看虎帳心猶壯曾學龍韜世已平
却笑壯夫投筆意時清寧作一書生

詠鴈字四首

一夜風霜過洞庭莫徭惆悵羨冥冥
蘆洲掩映成飛白竹塢迴翔欲殺青
右轉正如秦代壘橫行疑寫楚王經
君歸直向燕然去且為皇家好勒銘

翩翩六翮破寒煙初月纖纖列宿連
雨後糝糊濃淡墨風前斷續短長篇
綵霞淨拭紅絲硯銀漢平鋪白地牋
自罷結繩書契起憐君長在網羅邊

漠北湖南萬里通年年為客任長風
飲時渴驥奔泉上

棲處驚蛇入草中空裏作書皆咄咄日來多暇不匆匆
張芝自有凌雲意莫比藏真老禿翁

遠拂殘霞攪斷雲始知筆陣掃千軍元常法備皆三折
阿買詩成寫八分賦客近為離合體經生能辨古今文
危峯阻日君須記隴首羣飛背夕曛

薛侍御出按貴州便道歸雲南省觀

繡衣持節出長安南入牂牁路萬盤重箐濕雲常欲雨
點蒼晴雪不知寒登車自埽豺狼跡遇客爭彈獬廌冠

遙憶樹頭新酒熟
刺桐花下正承歡

婁堅

寄孟陽

炎蒸客路子如何
秋入庭蘭阻嘯歌
京口列營看射戟
石頭荒刹共捫蘿
畫圖層嶺青嵐出
詩句長江白浪多
縱道山川殊快意
不將離索飽經過

孟陽長蘅游西山又過虞山遙有此寄

春游處處屐堪攜
看徧青山暮靄低
高興又聞尋覆釜

傷心應不到藤谿梅花綻盡香猶遠柳葉開遲色未齊
我怯輕寒身嬾動時傳客至問幽棲

程嘉燧

雨中曉發臨安雙谿道中作

回首青山半入城碧潭時傍碧巖縈煙中小寺開晴翠
樹杪重泉帶雨聲飲馬苕溪逢漲發問人天目指雲生
試觀萬壑千巖裏何似山陰道上行

富陽桐廬道中早春即目東吳中朋舊

暮倚城樓江日曛
曉過山縣市煙分
迴峯凍雨皆成雪
出霧危巒半是雲
沙際年光催鳥嘯
冰間寒溜動鷗羣
吳江越嶠千餘里
春賞何由早寄聞

子柔將歸憶別漫賦

巷南秋雨過君家
獨掩閑門幾日斜
無那別來偏皎月
即看歸到負黃花
春江在眼新安郭
暮雪驚心梁苑沙
欲去念君仍未決
窮愁相見莫相嗟

因舍弟歸東山中親知

故人相望渺天涯久客傷心憶歲華城上雪聲遊子屐
縣南風色酒人家郵筒近隔錢塘路歸纜遙牽歛浦沙
鄉國清明正愁絕憑將雙淚溼梨花

東林寺雨中張次孫丈話舊

憶昨南徐官舍東江心遙夜與君同重看焦嶺終宵月
却話松寮徹曉風病眼向梅空脉脉旅愁兼雪太匆匆
可憐襆被尋君處暝雨寒煙野寺中

題張仲復西康草堂

我愛城西張仲居天寒鳥雀下堦除彈琴響動游山帖
隱几風開種樹書留客添燈嘗蜜酒呼兒吸水煮河魚
尋常自愛吾廬好若到君家愧不如

過虎丘尋君實爾常夜歸憶前月同伯美於此
送客

吳洲四月尚春衣日暮停舟轉翠微又喜清暉山頂見
不妨疎雨樹頭飛黃鸝入寺渾相識白月當門恰送歸
灌木陰陰萍沼綠重游心念故人違

瓜洲東郭訪王隱士同方平仲

安穩茅齋水郭東，沙圍曲映綠楊中。
餘寒出浦三春酒，片雨橫江五月風。
遠意幾因高士發，清游難得故人同。
斜陽醉眼連歸路，野翠煙嵐半彩虹。

歲暮懷孫履和李茂修

故人不見歲將窮，臨別風煙在眼中。
嶽院夜眠春澗雨，浦樓寒醉雪山風。
谿南郵使明朝發，江北來帆二月通。
廿載東橋歌酒伴，他鄉殘臘夢應同。

寄莊將軍

僧榻書廊卧夕曛興來吟嘯每過君
梅殘燭燼疎窗雨
雪沍香濃小閣雲
茶作松風先破睡
墨添山氣待微醺
自從一別蓮花府
月下笳簫憶共聞

春暮與鮑谿父言懷

江上楊花覆白蘋
對君猶喜見殘春
雲山家在難乘興
風月閑來自愴神
旁舍盤飧留客共
向人懷抱好誰親
山中只是空相憶
漫道天涯即比鄰

病中送履和兼懷李茂修

江楓落後見君遲，欲雪前林又別時。
多病酒杯難共醉，獨行歸路更相思。
家人望遠愁腰帶，舊侶逢春問鬢絲。
身世飄蓬何日定，楚雲淮水各淒其。

再過杭州訪許成之同鮑谿父話舊

湖頭城角雨如麻，宿酒殘歌夜鬪茶。
自笑經過無此客，欲尋好事更誰家。
留連別夢猶芳杜，早晚歸帆已棟花。
人事年光應共惜，相逢爛醉是天涯。

同聞師兄鮑谿父登北高峯宿絕頂僧舍即事
雙峯徑轉石林蒼攜客捫蘿宿上方澗飲斷虹明積翠
湖飛片雨亂斜陽東來島嶼吞江郭西去雲山指故鄉
夜久禪心同寂歷松風諸嶺一何長

七夕懷平仲揚州

江邊一別兩悠悠湖上相思且滯留千里星河同此夜
甘橋明月自三秋無由結伴還鄉國況欲因人作遠遊
潦倒更於何地會見君空已雪盈頭

十六夜登瓜洲城看月懷舊寄所親

十年曾宿焦山寺浪急天寒少客行明日片帆仍遠道
一時雙眼復孤城暮山欲盡離尊歇黃葉全稀白髮生
別後故人無限憶隔江同見月初盈

李洋河舟中戲為俚體遣意

半似春還半似秋不成估舶不成游幸無冰雪傷離思
且有雲山遮客愁遠鴈如塵飛水面亂帆疑葉下吳頭
明年更鼓瀟湘柁老淚憑添萬里流

次韻寄子柔兄兼東所親

東林還往近如何客裏春寒忽忽過望遠不堪芳草遍
開書應對落花多天邊帆影揚州路雪後江聲灩澦波
為報心情蕭颯盡相逢無復舊悲歌

仲夏偶過長蘅水檻即事

輕舟出郭信風颺過雨陂塘五月涼山檻水添平入戶
野亭樹密遠生香村中客少過逢簡醉後情深笑語長
頻到不須仍載酒自煎花乳間黃梁

雨中過張魯生清夜聽曲

新賞由來興不違，忍逢高唱獨言歸。
共穿疎雨牽花艇，自載清尊款竹扉。
紅蠟淚多時見跋，嬌鶯聲斷一沾衣。
已拚白髮從今盡，莫放梁塵到曉飛。

五月一日雨中過東林軒惜別

寺門橋下獨徘徊，谿樹籠煙黯不開。
月出可忘攜策到，泥深曾幾泛舟回。
冬青香滿花堆雪，苦棟風多徑糝苔。
從此經時蹤跡斷，更誰衝雨亦能來。

答江似孫謝遺錦衾

故衾何意託交懽得共高人寤寐寬不分秋風破茅屋
從教夜雪滿長安空牀獨枕琴三尺遠札相遺錦一端
早晚平津誰與報布衣思庇九州寒

姑孰道中見梅花

燕南薊北限春光瞥見江梅劇斷腸花被雪禁猶黯淡
影遭風橫正郎當斜臨官道窺郵騎開傍旗亭撲酒香
纔是玉門關外客莫憑羌笛訴昏黃

答朱子暇見訪

幽棲元不厭山深把臂何人共入林樹下涼風中散客
窗間白日上皇心青苔果落空庭得流水花香別澗尋
但恐鶴書知處所不容高卧只如今

招得無家一布袍留連酒聖狎詩豪林端水聒歸潭靜
雲裏峰來跂石高曉案晴光研竹露夜瓢明月煮松濤
山中入夏先涼冷便約湖心弄小舠

題梅花草堂

竹寒沙碧堂成處移得官梅遶屋栽未到花時留客坐
恰當人日寄詩來出郊路熟香偏早傍舍春生水正迴
湖畔垂垂天欲雪鄉愁驛信兩相催

何人曾送草堂賢幾首巡簷索笑詩東閣去逢春動候
西溪邀宿月明時山空翠袖禁寒薄雪緊青燈放燄遲
煙角霜鐘斷消息窗前一夜為相思

秋雨端居有懷

百日全家藥裏間不論風雨不開關籬邊秋水愁中路

郭外春湖夢裏山時倚餅花滋起色漫懸梁月見衰顏
南村賸客如相憶好就茅齋一宿還

徐禎稷

客有問予蜀道者詩以答之二首

奇遊莫問蜀江山萬里真堪損客顏白日風霆三峽水
青霄樓閣百牢關猿聲棧道捫參處龍氣京華望斗間
峩月巫雲看不盡自疑靈漢泛槎還

嚴嶂層林畫亦冥千崖懸磴度寒星雲顛叱馭王陽坂

天角題詩白帝亭高瀑怒翻空外練恠峯羞作世間青
竹枝唱徹西陵暮何限愁猿月裏聽

登丹鳳樓在上海北城上

咫尺風塵亦勝遊萬家城郭暮煙浮潮聲夜撼黃龍浦
海色天高丹鳳樓孤樹乍明含落日長雲忽斷見清秋
蒼茫勢盡憑闌外彷彿青霞是十洲

楊漣

積雨小霽同劉生伯王思延出遊賢隱寺

震雷河外初收雨出眺賢山曳短筇一徑斜穿通薜荔
數峯高插削芙蓉仙留石洞人何在僧定松門雲自封
羈客此中虛望眼徘徊預恐暮城鐘

題柏子園青雲閣

官閣凌空汶水深金飈初動客登臨浮雲易改三山色
落葉先驚萬里心江上美人遺雜佩城南少婦拭清砧
繁臺兔苑今禾黍日暮憑闌思不禁

左光斗

正月三日飲玉成宅得冬字

庭院深深樂事重
雨餘滑屐更相從
屯雲古樹依城濕
著席寒梅照眼濃
語燕流鶯聲漸遍
遠山高閣望全封
醉來忘却經三日
談笑依稀似去冬

李標

題梁慎可墨香亭

古樣蕉衫白接羅
芳亭長日坐支頤
焚香自悟無生訣
拈筆閒摹有道碑
竹韻松濤清自遠
花觚茗盞靜相宜

近來愛寫黃庭否好換新鵝浴小池

鄒維璉

初至夜郎

遠戍天涯事可悲疎狂真負聖明時誰言鴻鵠能千里
差喜鷓鴣託一枝草野數懸丹闕夢鄉園空望白雲垂
高山流水情堪詠已擬埋名老下帷

姚祚端

遊弁山古法華寺

因愛名山結境幽
同來擬續泛觴遊
林深日到方知午
松蔭風生不待秋
徑路幾曾緣客掃
山花今似為人留
牢愁至此多消盡
還問明朝有酒不

傅振商

白髮

西風寒影集林鴉
落日愁心急暮笳
宦興無能回白髮
秋光偏自染黃花
砧敲渭水愁煙破
鴈度秦雲碧樹斜
秋草不知人意遠
悽悽故自繞天涯

趙岫

莊河村主人

落日牛羊嶺上村誰開三徑召王孫
山容似黛斜侵檻水字如巴曲到門
野客行藏無揖讓田家賓主有盤樽
欲將谷口煙霞色並向桃源洞裏論

韓敬

題南陵山房

碧山初築澗之濱選石疏池位置新
坐守庚申偕道士

橋名丁卯續詩人深情只託支頤笏時樣爭傳墊角巾
縱是漁師魚不賣暇從秋浦戲垂綸

張慎言

過洹水將入里有懷長安故人

洹水纔過丹水流客愁爭似水悠悠汀洲綠映征袍淺
桃李香迎語鳥柔耽靜計將書卒歲懷人豈但日三秋
歸來鄉里都如故晚計方思馬少游

文翔鳳

遊靈山

聞說看山已不禁尚堪蘿逕徧登臨
座從竹影移時轉
泉向月華映處尋
觴曲頗疑修禊事
枕流何似聽鳴琴
嵐溪待我能千古
底事清秋學楚吟

鍾惺

江行俳體

村煙城樹遠依依
解指青溪與翠微
風送白魚爭入市
江過黃鵠漸多磯
家從久念方驚別
地喜初來也似歸

近日江南新澇後，稻蝦難比往年肥。

譚元春

別栗仲芳諸子

遊集常添好，友情玉川風。日自幽清，春山碧處頻登閣。
晚燭紅時，尚啓城藥餌，相將停過客。吟披不輟，念平生
此中亦覺多離緒。愁負家園老去鶯。

尹嘉賓

秋日寄錢太史

屋梁落月思悠悠清夢依然到虎丘月滿講臺宵度曲
雲生西嶺晚登樓林香冉冉流清梵楓葉蕭蕭下小舟
苦憶風流錢太史賞心何日續同遊

莊廷臣

家居作

四朝宣力終何補中外驅馳白髮侵獨履冰霜凜臣節
各從俎豆見人心瞻依有子惟勤學俯仰無營只浩吟
鉤黨諸公先我去寸丹差可答知音

王象春

山居

雲與同閒鶴並孤
嗒然隱几得今吾
敲來石火炊先熟
服久山泉體自癯
隔舍有僧同說夢
抄方無劑可醫迂
曉窗嵐翠濃於染
自看長松過雨圖

馬之駿

伏枕

伏枕梅簷過柳衙
北湖又復負荷花
門因謝客全無籍

身欲稱僧尚有家七尺向拚同草木三生知久痼煙霞
餘年倘遂幽棲志剩我清湍舊釣槎

賀萬祚

周侍御行部

蘭臺使者舊知名攬轡從容江海情抗疏共看任伯雨
行軍還擬趙營平五花驄馬巡周道三輔黃圖歷漢京
不獨艱危憂水旱前籌更欲請長纓

朱大啟

同萍師赴沈公虔招看梅

早約探梅日，已西放歌白雪和聲齊。
倚樓好共高人笑，繞屋偏宜隱士棲。
香入深杯傾滿座，風吹殘月印前溪。
徘徊瘦影猶堪折，不覺橫條壓帽低。

李衷純

登岱

層巒絕巘轉氤氲，倒影凌虛日觀分。
方出河山同帶礪，忽驚噓吸總風雲。
珮環神女青霄度，陸博仙人洞府聞。

聖主明堂知欲啟
將無重過稷丘君

王坊

宿瞻在軒聽雨

憶曾信宿素王宮
今夕重留講院中
聲到竹窗霏暮雨
香回紙帳落梅風
挑燈夜映苔痕碧
沾濕朝看杏蕊紅
夢裏渾忘身著處
華亭百里岱雲東

曾楚卿

自芋原至車盤驛

數家煙樹鬱蕭森
人語殊方莫辨音
雲傍馬頭晴作雨
松橫嶺口畫成陰
闕城晚色疎寒木
古渡秋風亂夕砧
信宿淹留吾有意
故園已在白雲深

繆昌期

賦得秋聲一鴈飛

淅瀝金風動碧林
遙空獨鴈助長吟
聲寒絕塞三千里
影照長安一片砧
秦隴雲橫朝起笛
瀟湘月冷夜聞琴
於今聖世消烽火
北海應無繫帛音

洪葆原大闕政報滿還朝

錦帆簫鼓出江湄
水凍黃河驛路遲
鄉味久應忘荔子
客情偏自憶蓴絲
閭門柳色非前日
長樂鐘聲似舊時
聞道使君廉載石
江東父老望旌麾

周宗建

送德祖南遊

白門秋冷六朝煙
為憶棲遲又一年
此日布帆看獨往
到時尊酒亦應憐
山中解帶收雲貯
渡口聽歌借月懸

遲爾歸來同候鴈
黃沙匹馬共遊燕

張唯卿以微疴杜門詩以訊之

颯颯秋風入鬢寒
草堂高卧歲星看
金莖好解文園渴
米汁還尋栗里歡
睥睨晴雲流几榻
梵鐘隨月近闌干
知君息踵風塵遠
晚步東籬菊可餐

朱本洽

柬九先上人

野寺輕雲覆荔牆
棗花鋪地晚風涼
不知門外炎何似

但喜閒中味更長
雨過竹痕餘淺碧
月生松影辨昏黃
空庭著子吾猶懶
只與希夷乞睡方

范景文

湖上夜作

游情入靜始相關
歌管雖清亦暫刪
乘月遍尋湖上寺
披煙細認雨中山
荷風散水香初冷
嵐氣吹雲晚漸閒
幽賞仍須人共領
聽鐘坐待老僧還

齋中

頗嫌多事是尊生但得心閑近道情長與疎梅耐幽獨
儘教瘦鶴伴淒清掃花欲便親苔坐刪竹當防礙月行
片石積然無位置也同老懶畏經營

劉榮嗣

憑闌

高樓秋氣正蕭森罷酒憑闌且獨吟何處吹簫催暮雨
有人孤策倚荒林癖如米芾差存石懶似嵇康并廢琴
早已投閒吾計得入山何必更求深

坐王氏園亭作

秋向郊原靜處尋古牆圍繞華門深迂回窈窕層苔路
青紫丹黃千樹林風定小池開竹影日中高榭合藤陰
孤琴更在西林北遙領清商識隱心

潘曾紘

金陵感遇

花發垂垂歸興濃便教歸去若為容日邊潮合迷前浦
雨後煙開出數峯楊柳暗彫江岸笛松楸靜落寺樓鐘

閭閻三月音書斷夢入燕關第幾重

申紹芳

送張玉筍中丞進擢總河

玄圭初錫自宸衷四載勤勞特借公開府夙推真使相
導河新命少司空舳艫風引桃花浪海甸雲興瓠子宮
何獨甘棠思召伯轉輸專倚鄮侯功

方孔炤

己巳元旦早朝

紫閣金莖露向晨
鐘聲催出日重輪
青龍扇匝迎豐歲
白獸尊開待直臣
閭闔風生三部樂
玲瓏儀轉九州春
職方將上輿圖攷
不羨甘泉獻賦人

歸白鹿洞

虛將五嶽挂桐絲
翠積東山晚不遲
陽鳥似馴蘆葉性
秋蟲不誤蓼花期
閉門仲蔚容非隱
對壁王郎未是癡
怯與江濤同上下
鹿湖清淺好風吹

魏大中

息游

一夜秋聲萬木寒
乾坤何處足彈冠
時名盡向黃金起
世事多堪白眼看
已自故人嗟落魄
更誰同病問加餐
風塵伏枕衡門穩
行路於今轉覺難

黃尊素

同胡馨寰虞乾颺周玉汝集涵秋亭

羣玉山頭一逕通
孤亭踞頂破空濛
霏微翠影江流外
掩映湖光草色中
座客雄詞分謝李
碑文荒蘚辨魚龍

攜尊尚欲尋幽處煙火千家動晚風

登金柱山

乘興扁舟攬物華更將雙屐破煙霞山橫天末雲頭迴
塔落波心日脚斜誰念遺祠香火冷且留殘醉管絃譁
爭如江上垂綸叟賸有閒情數暮鴉

彭期生

送秋

悲秋秋去轉堪悲枉復登臨賦楚辭遠壑水殘斜照斂

荒原煙冷朔風吹天邊白鴈迷消息月下清砧感別離
蟋蟀似能占物候寂寥一夜傍牀帷

瞿式耜

遊虞帝祠次金道隱韻

祠宇蕭疎迴絕塵孤峯隨意著閑人窺雲應傍巢松鶴
破浪終同入釜鱗茶盞酒鐺全部史風篙月槳一江春
予與子暇道隱却憐嶺嶠仍無恙便託荒巖老此身
扁舟泛月而歸

沈德符

秋日家林

繞林行藥挈軍持，小插秋花寄遠思。
謀醉得愁因節飲，逐貧無效錯尤詩。
才頑未判陶弘景，癡黠平分顧愷之。
青舸畫橋黃葉寺，又勞谿友釣緡隨。

顧脣光


三月十七日馮素生偕諸同社過訪山齋

只賸春光十日奢，空齋兀兀憶天涯。
幾回約醉扶頭酒，猶及同看婪尾花。
小品試挑來燕笋，隔年還煮伏龍茶。

四方誰唱昇平樂我輩如何報物華



御選明詩卷八十七



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷八十八

詳校官原任主事

臣李斯咏

欽定四庫全書薈要卷一萬八千五百八十八

集部


御選明詩卷八十八

七言律詩二十一

陳子壯

春日侍諸父泛舟桃花塢

欲作郊居即讓西紅芳十里勝金堤不知南漢千年苑
更入東風幾曲溪負局客來籬犬吠和歌誰伴乳鶯啼
清時羣從多游好豈是秦人世外迷



姚希孟

神廟實錄告成恭紀

綿綿鳳歷過先朝壽域應同化日遙棋局漸翻洛蜀譜
海王不問渭涇淆九華帳裏耽恭默萬玉班中點寂寥
仁厚頗兼黃老治揆天無筆繪神堯

緬懷祖德豈難躋八柄河魁手自持鳳詔未聞傳墨勅
貂璫只許貢朱提兵符細柳將軍令國計元和宰相稽
蟬鬢秀才垂紫袖批紅不改舊標題

侯恪

春日入左掖門遇雪同倪武雙姚現聞陳弘景
分賦

紫禁春濃曉暈開
瓊絲搖曳碧天來
初疑佩玉迷仙仗
漸似臨風亂早梅
上苑鶯寒驚雨澁
平沙鴈冷憶霜回
只今共擬相如賦
寂寞金門滿繡苔

重遊西山

兩度青山已四年
重來非復舊山泉
崩崖樹老俱成石

絕頂峯高更有天
鐘磬不聞僧臘古
煙霞只覺鳥聲便
何須異日完婚嫁
早向松巢覓午眠

聞鴈

秋風秋雨鴈紛紛
無那羈愁入夜聞
不似寒砧聲歷亂
如將落葉影紛紜
盤江路險書難寄
雪苑人歸夢易分
老我燕山頻見訊
恨無羽翼可同羣

題畫

盡日看山興不孤
春風吹雨洒平蕪
林間鶯濕翻花見

石上苔明雜錦鋪
策馬人經千嶂夕
聽泉聲與片雲俱
何年卜築來居此
擁膝橫琴入畫圖

張瑋

江行宿淺灘

千里江流此一灣
暮潮落盡柁師閒
脩脩蒼荻鳴疎雨
隱隱玄雲列遠山
波靜自知憑岸穩
官慵肯厭客途艱
朝來晏起迎新旭
秋月秋風興不慳

丁乾學

送劉太史使朝鮮

漢殿遙齋詔一函
香爐特許換朝衫
天邊築館迎龍節
海上吹鐃遁蠟帆
問俗朱蒙時已改
探奇暘谷日應銜
歸來撰得殊方志
天外河流海外巖

吳麟瑞

長安春興

塵封官柳眼猶迷
黃鳥吞聲不肯啼
二月羽書淹塞草
十年馬足負香泥
長纓有策終難請
短札多愁未易題

忽憶孤山此時節亂堆雪片斷橋西

李吳滋

送曹安祖假歸

陶然共事白雲司幾度追隨笑語時年齒偶成一日長
禪心同對十門師每分陽羨驚雷筴迭和青溪踏雪詩
君去冷曹方是冷閒居賦就寄無遲

馬任遠

懷白礪甫

荏苒緇塵不可留
逢人到處問江州
夷門知爾同誰過
燕市憐余尚獨遊
風雨乍晴殘月照
琴尊久冷暮雲浮
蹉跎空作還鄉夢
蛩韻砧聲一夜秋

同胡滄陽詠報國寺松分來字

古木扶疎梵刹栽
慈雲引鶴自飛回
十圍老幹凌霄起
半畝濃陰匝地開
影帶嵐光過柰苑
煙籠翠蓋映蓮臺
風生白日龍鱗動
萬壑濤聲樹杪來

中秋

斗酒持螯漏幾更西風妬月片雲生氣氤不盡來還去
點綴無端暗復明乍見餘光分翠竹尚留微影落金觥
誰家唱出關山調徙倚胡牀聽遠聲

葉憲祖

江行

杳靄中流二水分人傳此地弔湘君南天漸隱已陵樹
西塞猶飛夢澤雲傍晚魚龍常涌沫隔江鳬雁自呼羣
年來已覺風波慣枕上漁榔處處聞

陸懷玉

也園

種藥雲根已十年，小園獨卧思悠然。
豈無幽徑通韋曲，亦有連山象輞川。
半砌苔衣清似水，一池花石小于錢。
歸來便是西疇長，晚稻秋香滿社田。

蔡懋德

赤壁

當年虎豹客愁攀，今在人煙秋色間。
勢壓江流欲倒水，

身行壁上更無山已開樓閣爭題詠未剪荆榛誰往還
且向亭西竹下去東坡居士一生閒

車中夢林子野荅句憶得春來夢後二語續成
一首

河間二月不飛花錯送東風拂袖遮馬入孤村煙漸破
人迷長陌柳爭斜春來到處皆酣酒夢後何人不憶家
未識長安今近遠黃昏更度板橋沙

毛以燿

村居

丘壑偏宜謝幼輿
清泉碧篠愛吾廬
祇知幽絕堪高枕
未解窮愁好著書
閒過山僧烹笋蕨
倦從野老課菑畬
夕陽流水荆扉靜
花滿清尊月滿裾

顧大猷

秋晚客雞鳴寺

古寺崔嵬俯帝城
攀躋漸覺旅愁輕
樓臺寒入三山色
砧杵秋高萬戶聲
向夕張琴依竹坐
有時待月伴僧行

從來禪室多心賞
几席無塵夢亦清

初冬社集甘露閣

嚴風動樹轉新寒
繫馬招提木葉乾
鐘鼓還鳴梁殿閣
壺觴雅集晉衣冠
江枯白鴈蘆初斷
地古青蓮露已殘
總是空門無去住
賦詩行酒盡餘歡

屠本峻

春事

華髮逢春春事繁
支離猶得傍長安
忽傳天上新榆火

轉憶山中舊藥闌家有酒田堪釀秫世無知己莫彈冠
燈前兒女遙相詫采采芳片不滿盤

莫是龍

得顧茂倫書及所著離思賦悵然有作

綠鬢傷春卧薜蘿青山起色近如何慣看交態尊前好
較是君情別後多明月自裁希逸賦片雲閒伴莫愁歌
家人倘問風塵色慷慨中原但枕戈

鳳凰臺

一逕幽深竹樹寒，崇臺百尺倚晴巒。
坐將雲物杯中變，行迫星辰掌上看。
丘壑幾人能濟勝，風塵此日共彈冠。
亦知靈翮游千仞，應有文章動綵翰。

顧仲方招隱園

清秋乘興訪名園，巖壑蕭疎桂樹繁。
花外朱橋緣斷岸，竹間蒼岫引飛軒。
空山猿鶴堪招隱，滿地煙霞久避喧。
翻笑淮南重方術，八公徒著養生言。

贈盧次楨一首

羨君詞藻似鄒枚曾擬梁園作賦才白石歌殘身未遇
黃金揮盡志堪哀江南草色煙中遠薊北山光馬首來
萬里行行從此始斷雲孤鳥獨徘徊

顧斗英

殘柳如新柳

西風蕭瑟柳條輕翻似依依乍向城看去尚含南浦恨
折來俱是故園情楓林解點桃花色杜宇能為黃鳥聲
留得舊時餘影在秋江一路月扶行

田藝蘅

雨中感懷寄諸故人

三十年來尚轉蓬
學書學劍兩無功
數椽茅屋寒江上
一樹梅花細雨中
聞鴈忽驚時序晚
對山不覺酒船空
高陽舊侶能相念
冰底雙魚尺素通

吳稼登

秋懷

當年竊藥事還真
碧海茫茫未許親
銀燭可憐徒向夜

玉顏無復更知春
清商感激愁中曲
落羽差池病裏身
奉詔長門能買賦
黃金取酒為何人

舟行歸思

大江日夜水粼粼
飛盡楊花不見春
枕畔獨吟愁裏客
鏡前雙笑夢中身
生能無累龐居士
老未忘情白舍人
兒女團圞歸便得
底教歌榭暗流塵

夜阻江上

風揭空江浪忽興
停舟斷岸石稜稜
遙聞野寺一聲磬

近辨漁家幾處燈歸信不如潮有准客程翻似夢無憑
薄寒誰為更衣計閒殺中閨半臂綾

金陵酒肆贈茅平仲

暮年看爾壯心孤落落酣歌擊唾壺但數一錢憐儿女
纔誇千騎笑羅敷梨花雨濕紅襟燕楊柳春藏白項烏
欲向盧家借雙漿莫愁不是舊時湖

梅鼎祚

九月八日城東樓晚眺寄史使君姑孰

落葉來鴻秋可憐孤城晚眺正蒼然向傳李白題詩處
重見玄暉在郡年霜後鳴砧千戶月風前哀笛一江煙
倚闌却憶龍山會誰共黃花插酒邊

劉潤

寄王仲房

不見風流王右軍詩名湖海日相聞歸期漫阻黃梅雨
鄉思遙懸白岳雲千里音書秋後斷一江南北夢中分
潭園草罷閒居賦誰共清尊醉夕曛

彥科

茗山洞

羅隱曾隱此山有蓮花
峯相傳仙人曾憩其頂

峯陰回合擁青蓮
詞客遺蹤尚儼然
啼鳥故疑歌白雪
飛泉猶是奏朱絃
林扉蕭瑟無塵躅
石室逢迎有洞仙
安得向平婚嫁畢
拂衣吾亦弄雲煙

宋登春

江閣晚望呈荊州公

幾處蒹葭連岸白
數村煙火隔江明
無家自合依劉表

有賦誰能薦長卿巫峽去帆江路隱衡陽歸鴈暮雲平
黃金已盡還為客湘漢長歌萬古情

洞庭送徐荊州投劾東歸

秋來為客易沾巾又向瀟湘送逐臣煙草斷雲橫楚塞
夕陽落鴈渡江津天涯白髮無知己湖上青山有故人
回首吳關空悵望何年滄海共垂綸

秋日待家書不至感賦此詩

澤國寒風木葉稀悲歌昨夜賦無衣自添白髮年華易

用盡黃金生事微
易水似憐湘月遠
燕鴻還共楚雲飛
魚書錦字無消息
秋草閒門又夕暉

飲酒

城上秋風動薜蘿
十年江客意如何
酒腸方大黃金盡
世事纔知白髮多
月冷却憐孤鶴怨
天寒誰聽飯牛歌
平生還愛於陵子
用拙為園老一簑

九日集楚雄樓懷舊

沱水燕關憶壯遊
短衣孤劍老荊州
天涯縱酒逢青眼

馬上看楓掉白頭日暮飢烏還繞樹煙寒古堞自深秋
江空鴻鴈無消息千里相思月滿樓

江陵送王惟材還趙郡

湘臯煙草洞庭雲此地逢君又送君趙瑟悲涼那可問
楚歌淒斷不堪聞遙山對酒春當暮臨水攀花日未曛
憔悴形容獨歸去江樓細雨歎離羣

八月十三日東永嘉王秉之山人

寒竹叢叢橘柚懸短籬茅屋向城偏桂花釀酒秋將半

桐葉題詩月未圓
越客還思青海嶠
楚鴻又度白雲天
好山欲買多招隱
袖裏曾無子母錢

馮遷

復餞顧內翰于南浦因經曹公戰壘

映竹船窗水氣涼
渚風微泛白蘋香
今朝相送即相別
明日故人非故鄉
蔓草女牆橫斷靄
荻花軍壘護斜陽
銀河舊與滄波接
一望靈源萬里長

葉之芳

靈江舟中

赤城東去水滢洄無數寒花夾岸開
越國青山臨海盡
靈江秋雨挂帆來
舟中客淚隨楓落
天外鄉心逐雁哀
如此蕭條須盡醉
已知淪落不言才

柳應芳

正月十七夜宴李太保西第

正元望後宴平津
羅綺初筵入早春
盤馬闌車纔罷夜
殘燈剩月尚宜人
梅花落到歌前緩
柳葉開經勝裏新

不信金吾仍放禁歸時看取六街塵

送李臨淮上公出鎮金陵

節旄南建歲將闌雪落津亭曉未乾
百戰山河重作鎮三朝劍履獨登壇
營開江障鶯聲早路出邊城馬色寒
天與宗臣憂不細金陵千古舊長安

正月十五日同盛太古集雨花臺

郭外香臺勝日登天花曾現六朝僧
宜春猶載屠蘇酒不夜先觀太一燈
柳上輕煙吹作雨梅前殘雪積成冰

舊遊更向新年感
草色青青似杜陵

西湖春日戲贈潘景升

武林門外正春華
十里空湖帶淺沙
夾岸樓臺千佛地
隔城簫鼓萬人家
青絲遊騎乘朝日
紅粉回舟映晚霞
莫訝劉郎歸未得
六橋芳樹半桃花

安紹芳

送曾中丞入蜀

玉節遙看萬里行
鳴笳吹角動西京
天邊劍閣雲連棧

樹裏巴江錦作城，檄到百蠻新。
喻蜀圖開八陣舊，藏兵寨帷父老煩。
相問辭賦何人似長卿。

黃維楫

夜思

草色煙光向晚淒，望鄉人自滯淮西。
風傳鼓角更初轉，霜落關河斗漸低。
夢欲成時逢鴈過，愁方生處有烏啼。
家書倉卒應難達，不是秋來醉懶題。

盛時泰

同金子坤陪羣公登雨花臺

紺殿珠宮結駟行登臺共豁遠遊情
林花雨霽雙峯出雲木涼生一鳥鳴
禁苑晡煙開樹色秦淮春水長潮聲
却因楚使誇雲夢愧作諸生賦帝京

燕子磯

渺渺寒潮帶石磯潮聲山色兩相依
陰雲翻浪明秋日霞氣蒸林生晚霏
巴蜀船從巫峽下荆吳人自海門歸
聽歌酌酒銀河曙坐見高天一鴈飛

望憑虛閣外山色贈詹東圖因寄陳仲魚

春雲如黛點鍾陵湖水生波盡解冰幾處東風迴弱柳
千巖雨色潤垂藤香筵寶座初聞梵塔院蓮龕正試燈
閣上莫辭同醉酒望中原草漸層層

張正蒙

春暮淮上遣興有懷恩公

水漫秦淮舊釣磯一竿每與俗情違垂垂密柳鶯啼早
寂寂重扉客到稀綠暗桑林蠶葉老青連藥圃兔苗肥

焚香欲就蒲團坐鐘磬沈沈隔翠微

溪上居

小結衡茅避市喧寒流瀼瀼抱孤村扉懸白板心猶遠
几隱烏皮道自存傍岸漁舟分爨火倚窗明月引開尊
寂寥何限幽棲意不識風光似陸渾

俞安期

懷方子及時謫滇南鹽官

一辭畫省動經年疲馬長驅萬里天漢女蛾眉同輦妬

楚臣芳草異香憐
謫居敢怨監鹽井
領郡應須乞酒泉
魂夢蒼茫愁遠道
夜郎西去總蠻煙

送顧道行副憲之山東

鬪雞走馬俗稱雄
絕島窮邊路亦通
卉服仍教歸禹貢
短衣須遣變齊風
嶽雲今古懸封上
海日尋常起夜中
我有所思愁遠道
自今長望泰山東

登祝融峯

中天積氣入清涼
雲霧翻看地混茫
雨挾蒼龍奔下嶺

星懸朱鳥定南方何年石簣藏金簡自古山祇禮赤璋
壇上長流青玉乳神池高捧帝臺漿

送余伯祥太史奉使還朝

虎觀頻年侍聖顏乘輶忽下五雲間翦桐遠奉分封命
視草重趨入直班仗外晴煙看薊闕馬頭春樹識燕山
懷君不為彈冠意清夢時時繞漢關

送劉長卿脩兵滇南

南國初辭法從班霜飛繡谷楚雲間前驅弩騎三千士

內固巖城十二關傳過赤虺浮瘴水詔來金馬祀名山
文章須遣通南極為領華風到百蠻

柱後高冠著惠文旌麾按部擁風雲山行金齒搜蠻壘
水戰昆明習漢軍落日重圍原上獵有時小隊障前分
西南君長孤懸地天際銅標想舊勛

潘大司空起拜御史大夫再督河漕奉寄二首
徵書新起大司空再歷宣房舊築宮芻粟轉輸闕國計
漕渠疏控見神功河源爭謂來天上水勢齊驅入地中

秦日豈須論鄭國周年何忝拜毛公

瓠子悲歌似漢家老臣寧許久懸車鑿渠昔見傳龍首
開府今仍建虎牙淇苑秋雲分捷竹金堤春水下桃花
從君倘許尋源去斗畔重占犯客槎

上葉少師

向聞談麈自從容牙後津津及老農羊祜虛勞稱舞鶴
葉公轉自好真龍亭開一畝成玄草家近三山是赤松
久為掃門吾獨耻可容策杖客相從

陸弼

入閩關

羣蠻馬上俯崔嵬
海色遙臨睥睨迴
萬里職方周地盡
千秋風氣漢時開
危峯春晚常吹雪
雪峯山最高六月猶有積雪
急峽天晴忽起雷
聞道粵南猶列戍
將軍誰是伏波才

送丁南羽還沭陽

歲杪孤裝出廣陵
醉來絲竹易沾膺
敝裘冷犯山城雪
短舫昏投水店燈
酒及屠蘇堪奉母
經將貝葉獨依僧

紫霄巖畔好明月後夜思君第幾層

秋日懷龐學博

蕭蕭一徑入秋苔束帶時愁長吏催旅食又看鴻雁至
家書常共荔支來花邊小几聽禽坐竹裏孤琴候客開
千載賦成傷不遇白頭誰惜董生才

黃克晦

暮至餘干用劉隨州韻

楊葉青青柳葉齊煙村渺渺楚江西湖邊芳草連天綠

馬上春禽盡日啼
渡水暝雲千片落
到城新月一痕低
遊人元自耽風景
翻向黃昏憶故溪

水上虛舟得開字

小艇浮浮定復開
鷓鴣鷓鴣共徘徊
亂餘野渡行人少
雨暗江村釣者回
煙浦風多如落葉
沙汀水淺似膠盃
莊生同是身無繫
浪跡漂搖兩度來

和黃後溪翁七夕月下聞笛

絳河垂地七襄迴
弦月無雲半壁開
何處笛聲傳折柳

滿庭秋氣颯蒼苔遙疑靈鵲橋邊落暗渡穿針席上來
莫遣天孫聞此曲歡情離恨正難裁

西城晚眺

薄暮登城暑氣微風含睥睨欲沾衣青山滿目慚高隱
白髮盈頭愛落暉水帶平蕪雙鳥下雲連遠樹一僧歸
深杯未覺黃昏盡漁火遙生垂釣磯

鄭琰

寄黃山隱者

傳聞軒帝有仙蹤
古洞無扉對亂松
半讓石牀供蟋蟀
細裁雲葉補芙蓉
分將月夜三千里
買斷秋煙七十峯
尚憶我留湯口寺
隔林疎雨聽殘鐘

贈林純卿

十載看花入醉鄉
燕姬招隱白雲莊
罷官卜宅思栽柳
垂老將身學賣漿
夜月邀僧同鷁首
春湖供客典魚腸
孤山萬樹梅花發
翦燭裁詩夜未央

春日西湖即事

蘇小門前柳帶煙，煖沙晴日水如天。
杏糜供作宜春酒，榆筴分爲買笑錢。
芳草綠侵騎馬路，落花紅襯釣魚船。
杜鵑不解遊人意，催盡韶光又一年。

奉和張司諫左掖夜直

漢殿秋生禁柳黃，露融仙掌色蒼蒼。
銅龍水咽雞人漏，金象煙銷鳥篆香。
雲度鐘聲浮苑樹，月臨花影上宮牆。
夜聞待詔傳天語，法駕明朝幸建章。

王伯稠

和韻

春風千里憶佳期
鏡裏空憐玉樹姿
驚夢暗憎鸚鵡喚
避人偷寄伯勞詞
月窺翠幌愁相語
花入珠簾恨自知
爭信文園憔悴客
漸寬腰帶鬢如絲

汪乾利

泗上

芒碭山前秋草多
彭城王業竟如何
雲來還作真人氣
風起猶傳帝子歌
朔雁南飛離紫塞
淮流東下接黃河

知君躍馬能乘興一路江山取次過

費元祿

金陵詠懷古蹟

善泉池

滄池潏沆鑿昭明前代風煙九曲平
錦纜不收菱葉爛紅亭半啗浪痕生
沙環鳬渚邀垂釣花積魚牀隱濯纓
客醉何勞歌桂樹就中山水自忘情

勞勞亭

八月金陵天氣涼
勞勞亭畔立斜陽
誰家別淚霑紅袖
幾處秋風起白楊
沽酒城邊頻繫馬
聞歌道上總思鄉
古今無恙東流水
多少行人為斷腸

程可中

贈丘魯生

旅食無端笑滯淫
鄰居猶是費招尋
風流南郡談經帳
羞澁長門賣賦金
送盡花神春未艾
檢殘藥裏病偏侵
空江日暮靈妃曲
久向天涯負賞音

葉太叔

曉晴

一月未曾乾一日雨聲昨夜喜初回
高霞結海晨光滿
錦樹依山秋色開
鳩厭舊巢將婦去
鷗憐新水引雛來
清羸衰疾何時起
獨抱漁竿坐石苔

嵇元夫

立秋日盧溝送新鄭少師相公

單車去國路悠悠
綠樹鳴蟬又早秋
燕市傷心供帳薄

鳳城回首暮雲浮
徒聞後騎宣乘傳
不見羣公疏請留
三載布衣門下客
送君垂淚過盧溝

何璧

西湖尋曹能始

垂楊漠漠荇田田
何處春風十四絃
放鶴僧歸三竺雨
聽鶯人過六橋煙
詩尋蘿薜誰邊寺
酒載桃花第幾船
遊子天涯魂易斷
非關春樹有啼鵲

鄭翰卿自新安移家金陵詩以訊之

南北飄零逐燕飛營巢今復傍烏衣家移白下原為客
夢到黃山不是歸廿載看花憐並蒂半生栽柳歎成圍
江天處處皆新水好向垂綸燕子磯

江禹奠

登堯峯

空王樓閣鎖崔嵬水抱雙峯海色開古洞雲靈龍已去
春巖花落鳥啣來閒看幽草平苔砌剩有疎松拂石臺
十里橫塘渾在眼不妨乘月放舟回

野望

散步登臺信杖扶
蕭蕭木葉下平蕪
空江霜落魚龍卧
斷浦煙微雁鷺呼
矯首長天家共遠
側身異地月同孤
年來消渴文園甚
却望金莖露有無

登顏公山

千尋青嶂鬱嵯峨
鳥道盤迴出薜蘿
地坼陽窩通海脉
山環螺曲仰天河
燈懸梵閣星辰亂
龍隱香池雲霧多
信是顏公傳偈處
雨花片片下巖阿

姚旅

囊山雨夜集

寺如蜂舍掛崔嵬尊酒偏宜向暮開
春雨燈前僧共話
麻姑道上客初回
窗蕉葉響時清耳
林橘花香夜到杯
不是我曾耽勝事
杉關竹院冷蒼苔

朱純元

東溪港

十二街頭跡已賒
草堂低占白鷗沙
武陵此去無多路

灤水西來第幾家
野岸綠蕪飛燕子
汀洲紅雨落桃花
滄浪不洗塵埃耳
只許漁郎泊釣槎

錢允治

同汪魯二將軍登寶山看海

地軸東虧接混茫
空明何處是扶桑
青山一點孤城黑
碧月半輪殘照黃
橫海樓船天漠漠
隔沙煙樹水蒼蒼
野夫却喜狼烽息
醉飲將軍寶燾旁

送謝友可守順慶

五馬翩翩向益州三巴風景句中收
天邊山色隨人轉樹裏江聲繞郭流
諭蜀有時還草檄籌邊無釁亦登樓
故交零落雙魚遠別酒殷勤勸不休

聞柳陳甫客塞上寄憶

一宿齋頭馬遂西秋風紫塞陣雲低
黃鬚未學鮮卑語丹竈誰封太乙泥
此去可經藏甲鴈何時重過浣花溪
宵來明月殷勤照霜落軍城聽鼓聲

周履靖

清嘯

尚志生平泉石盟
囂囂巖壑傲簪纓
身同孤鶴千峯繞
迹似流雲一片輕
室秘丹爐凝紫氣
枝藏玄鳥遞清聲
野人拾蕨堪為餉
何必扶藜入禁城

不隨時輩較浮沈
卜築茅堂近竹林
幾處幽禽啼樹密
一番驟雨落花深
牀餘書卷從吾檢
徑滿蒿萊謝客尋
自是野人成懶癖
高山流水是知音

生平疎散愛巖栖
白苧村前鴛水西
寂寞草堂芳樹合

崎嶇石徑野雲迷柴扉盡日閒青草野叟隨時步碧溪
掃榻淹留高士駕開樽取醉索新題

年來懶慢謝經過幽壑閒門掩薜蘿長晝堦前蒿草翳
深秋籬畔菊花多空庭舉袂因調鶴淨几臨書欲換鵞
聞道湖南新月霽漫移蘭棹泛澄波

數里村墟背郭偏柴門深鎖綠蘿煙荷花凋盡三秋葉
桂子飄殘八月天把酒漫看陶令菊餐英遙誦楚人篇
林端颯颯涼風度欲覓鱸魚理釣船

吳夢暘

楊仲明見訪有贈

林僻相將學課農，猶煩朋舊遠過從。
出門覓取誰家酒，隔水聞來何寺鐘。
往日姓名疑劍俠，近來鄉曲號書慵。
自誇興到還多事，手植荒庭一老松。

甲寅新春對客作

瀉盡流澌春氣溫，一溪新漲舊柴門。
野僧同住權為寺，水鳥孤飛不出村。
瓦鼎祇應烹臘雪，藜牀最好傍朝暉。

過從總在滄江上安有生平未吐言

過愚公虎丘寺

烹葵剥棗儘相關坐到昏鐘始下山弟子可知皆白足
老夫安得不蒼顏花飛日日何曾掃柳長村村只未攀
路黑出門燈肯借畫船簫鼓幾家還

己酉新春二首

自擬今春懷抱開林扉時復掃荒苔沙頭鷗鳥休飛去
野外梅花許折來多少誤人空識字從容留客不銜杯

題詩徧問諸名勝肯入廬山般若臺

百年何負草堂靈詎使尋常問客星
不種公田仍減產尚無飢色喜添丁
人間安用屠龍技方外曾携相鶴經
空手出門風雨至也須蓑笠問樵青

茅維

春晝戲詠

春晝陰陰度網窓春愁極目蕩春江
不知何處吹花片忽有餘香到佛幢
紅藥風翻嬌第一紫丁煙濕艷無雙

如儂自愛空林綠繡徧苔錢帶壁缸

王野

越中送僧還舊山

折柳插瓶溪水灣此方緣盡又思還
春花乞食雲門寺秋葉翻經瓦屋山
雲起珠林封舊跡月臨寶地憶慈顏
知君身似旃檀樹已去留香梵宇間

重陽前一日李本寧招集寶石山得來字

亂葉翻飛託草萊衆賓分坐幾亭臺
天低煙樹千重沒

雲破江山一半來，皂帽受風先欲落。
黃花候日未全開，歲時爭在人前好。
多把茱萸看一回。

三月三日鴛鴦湖

鴛鴦湖水樹邊斜，橋李城東坐白沙。
三日風流仍鄭俗，千秋脩禊說王家。
美人羅襪憐芳草，公子銀罍惜落花。
向夕輕橈回畫舸，前洲新月傍殘霞。

舟泊毘陵驛待友不至

毘陵流水自濺濺，荒草城西獨泊舡。
亂馬嘶殘官舍日，

羣鴉啼散女牆煙抱關小吏秋鳴柝賣酒妖姬夜數錢
度盡疎鐘君不到空留片月向人懸

范汭

登縹緲峯

天近筍輿如踏空翻翻巾舄泠泠風遠尋亂嶂出帆外
近數諸村懸鏡中沙草微茫似楚澤澗花淒冷非吳宮
湖西湖東盡堪望兩地鄉心誰與同

吳鼎芳

雨渡橫涇懷孫惟化

東風作冷石湖船
節屆清明倍可憐
一日客程偏遇雨
幾家茅屋不生煙
野田水綠迷楊柳
古廟花深出杜鵑
寂寞橫塘人去後
吳姬歌舞自年年

西湖

嫋嫋東風蝶試衣
綿綿芳草燕爭飛
堤邊楊柳青絲騎
水上桃花白板扉
三竺片雲雙樹隔
六橋殘雨一僧歸
年年最好春陽月
無那鐘聲送夕暉

峽山曉起

隔林清磬漸無聞
已有晴暉映漱紋
掃徑不妨留鶴跡
開門祇許到鷗羣
寒峯獨透千層雪
野水雙鉤一抹雲
手啓香函看宿火
碧霞裊裊古花文

龍吟洞

重嵐曲隱樹中央
乍有閒僧搆草堂
帶雨龍歸磁鉢潤
銜花鹿過衲衣香
殘秋待月投空洞
後夜和雲宿上方
一種紅蕉舒艷色
名樓高處傲青霜

吳兆

旅次書懷

幾年不種漸谿田，覺我疎慵更勝前。
嵇阮豈須經世策，巢由何用買山錢。
莫愁湖上春攜酒，長樂橋邊月泛船。
惟有古懷消不得，臺城衰柳白門煙。

春夜有懷姑蘇

潮落秦淮月映沙，金閨有夢在誰家。
不堪暮雨楓橋別，無賴春風茂苑花。
舟蕩漣漪歌子夜，窗臨睥睨聽啼鴉。

分明舊事渾如昨過柳經梅幾歲華

喜郭昭自廬山見過

荒村歲暮誰相問惟有籬花慰索居
遊過山川常在夢別來朋舊久無書
秋風烏雀喧禾黍落日牛羊徧里閭
即此蕭條空館夜與君相對話匡廬

沈野

懷王澄伯卧病

落紅寒食漸紛紛強自携尊對夕曛
春到馬卿偏卧病

徑開羊仲正離羣林風幾處邀歌扇花雨千家撲舞裙
何事與君俱伏枕鶯聲喚友不堪聞

汪長文張成叔北上便道見訪

烏皮几淨映莓苔卧病柴扉晝不開庭樹葉齊花盡落
屋梁塵動燕初回黃金散後青山在三徑荒時二仲來
借問一尊留茂苑何如並馬向金臺

寄陳履吉

故人閩海結茅堂海上相思更渺茫地氣未春先見草

山風迎臘不飛霜
林深採藥窺猿嘯
田熟開扉覺稻香
我欲移家同避世
可能白髮老滄浪

石沆

中秋

江村此夕意如何
道是橋平水不波
彷彿空中倚樓閣
分明鏡裏現山河
當筵自對賢人酒
得意閒吟孺子歌
明月若教陪盡夜
只拚清露濕漁蓑

秦鎬

李元鎮滑縣署中

君忘北上我忘還
冷日奄奄白馬閒
吏散只如為客樂
牘銷翻比在家閒
三杯苦茗中冷水
一卷新詩大塚山
殘雪滿檐冰半砌
忍能相對不開顏

朱雲卿

贈張慎伯居士

梅竹蕭蕭舊隱居
却依雙樹結精廬
方酬南岳高僧偈
未答東山太傅書
賓館有田多種秫
柴門臨水不為漁

春風日日閒花落三徑無人自掃除

冬夜懷歸

寒風颯颯夜蒼蒼臘月江城卧雪霜
祇為食魚常作客偶因聞雁又沾裳
青山夢裏行難到白髮愁中鑷更長
不見北堂萱草色憂心那得暫相忘

澌水移家

移家東郭十年前東郭移家又十年
忍割煙蘿還地主笑驅雞犬下江船
鵲鵲原上風偏急烏鵲枝頭月正圓

臨發不禁回首望并州桑梓自堪憐

秋柳

搖落天涯正此時蕭疎多見路旁枝一朝染露全無色
何處含煙尚有絲漢苑也應隨日短隋堤難道入秋遲
陰陰滿眼河山暮愁絕那堪帶雨垂

一夜西風那便凋他鄉何處不蕭蕭依稀有葉還無葉
搖落長條復短條難忘折來情脈脈更愁看去路迢迢
經過若問傷心地涼雨寒煙鎖灞橋

商家梅

同伯敬渡漳河

不覺朝從鄴下過更於薄暮渡漳河
頻詢故蹟情難減為記遺文事轉多
枯柳覆村疎有路寒雲隔水去無波
濺濺俱是千秋恨銅雀風流可奈何

宋珏

湯宣城詩有長橋細月眉相約之句
有所懷極賞之惜其全篇不稱春日
坐浪樓戲為足之

寂寂春山一鳥鳴
春江入夜亂春聲
長橋細月眉相約
遠浦微波目共成
歌扇裂餘猶見畫
舞巾題處已無名
那堪咫尺天涯路
空對繁星達曙明

王醇

集嚴道澈雲松巢

園徑蒼蒼煙靄間
畫欄人度板橋灣
簾衣香冑春殘絮
屋角青飛雨後山
松吹暗搖琴曲冷
池波深照客心閒
銜杯不使疎櫺閉
巢濕紅泥乳燕還

寄李達生太守守巨津

笳蠻遮在碧煙叢
浪說車間已畫熊
官舍轉離孤郡遠
家書常隔一年通
醬分簞葉香消瘴
布納桐花軟貼風
鄉思偶停時出郭
閒看調象亂山中

王道通

征人婦

離愁壓黛老鉛華
蕩子從戎不到家
萬里請纓隨鐵騎
十年橫劍阻金沙
書封青鎖春深淚
燈落紅閨夜半花

正是斷魂眠未得綠槐風雨數聲鴉

齊策名

游浮渡

山面疑從水面分丹崖碧樹氣氤氲關開石竇深啣月
巖捲晴湍半入雲池湧金蓮浮石出笛橫洞口隔溪聞
欲將一笠煙霞老常伴山中麋鹿羣

暑中飲黃石環齋頭

路轉林塘卜築深參天古木畫森森花亭鬪局風聲細

石嶼張尊草色侵忽散浮雲窺檻霽何來片雨入樓陰
酒酣遮莫催歸騎扶醉看予倚竹吟

寇學海

冬日晚登黃鶴樓

滾滾長江帶落暉仙人樓閣轉霏微雲橫大澤漁歌斷
沙冷晴川雁字稀檻外鳳皇銜月出洲前鸚鵡挾濤飛
莫言黃祖難容物詞賦而今有是非

憑闌極目萬山浮感慨翻憐到上頭伯業已隨孤鶴去

樓臺偏壓大江流，煙迷遠浦千帆雨。
濤觸寒磯五月秋，
笛裏梅花莫吹落，恐驚歲晚怨淹留。

鄒之翰

包山訪陸纂甫

竹石陰森帶淺沙，
考槃飛澗小橋斜。
如簧窓外窺人鳥，
弄影庭前送客花。
銷夏有灣堪釣水，
采香無徑可移家。
知君更得巖棲勝，
屋裏青山屋後茶。

程漢

塘上雜詩

亂水明明原上村
金沙路接白沙痕
燈藏石塔遙穿牖
鐘出山樓近到門
鳬為藻牽原自樂
鶯知花謝欲無言
年來不讀英雄傳
抱甕林中且灌園

杜大成

書愁

愁多奈可度殘春
浮世榮枯總未真
細雨夢中憔悴質
落花影裏寂寥人
山僧乍見仍憐瘦
野鶴長隨不厭貧

獨抱遺經卧空谷恐妨容鬢涅緇塵

于鑒之

雜感十首

錄二首

殘書一榻對松風卧讀微妨飲酒功
小院心情春暖後
高樓閒暇夕陽中
蟬留舊草驚飛白蝶去餘花慘夢紅
底處古人須見我偶然危膝類張融

嫩晴花氣減衣天靜夜蟠香月照煙琴在暗牀聞鼠過
石當虛牖見虫懸委形笑我無名屈宣髮欺人不惑年


安得山林藏下士風飄閒處即棲禪

周永年

寄張異度

擁書應不廢生涯藝圃知堪紀歲華
烏曰遠疑楓染葉
菽蘆猶待雪飛花但憑高閣收諸勝
莫判鄰園作兩家
我有行藏君信否半營五畝半三車

御選明詩卷八十八



總校官庶吉士臣侍朝

校對官編修臣莫瞻菴

謄錄監生臣和其聲

財團法人
佛陀教育基金會
釋淨空
敬贈

